

Evening Dogri News Bulletin,

01 August. 2025 समे .18:15 Hrs

इवनिंग डोगरी न्यूज़ बुलेटिन

Headlines

- भारत दे उपराष्ट्रपति दे ओहदे लेई चुनांऽ 9 सितंबर गी करोआया जाग। नामांकन भरने दी खीरी तरीक 21 अगस्त रक्खी गई ऐ।
- संसद दे बरसांती आहले इजलास दरान अज्ज लोकसभा ते राज्यसभा च बरोधी धड़ें आसेआ बक्ख-बक्ख मामलें गी लेइयै कीते गेदे हंगामें दे चलदे दौनें सदनं दी कार्यवाही गी दिन भरै लेई स्थगित करी दित्ता गेआ।
- मुखमंत्रि उमर अब्दुल्ला होरें अज्ज अहमदाबाद च ऐतिहासिक साबरमती आश्रम दा दौरा लाया ते महात्मा गांधी होरें गी नमन कीता।
- जम्मू दे सैलसफा मैहकमे आसेआ कई सारी धार्मिक ते सैलानी थाहरें गी सैलसफा सर्कट पर लेई आंदा गेआ ऐ।
- बड़ी भारी बरखें कारण उधमपुर जिले च कई घरें-मकानें गी नुकसान पुज्जा ऐ। मौसम दे सूरते-हाल गी दिखदे होई अज्ज डोडा ते किश्तवाड़ जिलें च सरकारी ते निजी स्कूलें गी बंद रक्खेआ गेदा हा।

<><><><><><>

EC-VP Polls

भारती चुनांऽ आयोग नै भारत दे उपराष्ट्रपति दे ओहदे लेई चुनांऽ दे कार्यक्रम दा अज्ज ऐलान करी दित्ता ऐ। भारती चुनांऽ आयोग मूजब इस चुनांऽ लेई अधिसूचना औंदी 7 तरीक गी जारी कीती जाग ते चुनांऽ 9 सितंबर गी करोआया जाग। इच्छुक मेदवार 21 अगस्त तोड़ी अपने नामजदगी आहले कागज दर्ज करी सकदे न। नामजदगिएं दी जांच 22 अगस्त गी कीती जाग जिस्सलै के नांऽ वापस लैने दी खीरी तरीक 25 अगस्त ऐ। वोटें दी गिनतरी दा कम्म चुनांऽ आहले दिन यानि 9 सितंबर गी गै तोड़ चाढ़ेआ जाग।

<><><><><><>

LS-Rs-Adjourned

संसद दे बरसांती आहले इजलास दरान अज्ज लोकसभा ते राज्यसभा च बरोधी धडें आसेआ बक्ख-बक्ख मामले गी लेइयै कीते गेदे हंगामें दे चलदे दौनें सदने दी कार्यवाही गी दिन भरै लेई स्थगित करी दित्ता गेआ। राज्यसभा दी कार्यवाही गी पैहले दपैहरी 12 बजे तोड़ी ते फी पूरे दिन लेई स्थगित कीता गेआ जिसले के लोकसभा च डंड रौली दे चलदे कार्यवाही गी पैहले दपैरी दो बजे तोड़ी ते फी दिन भरै लेई रौली दित्ता गेआ। पैहली बारी स्थगित होने दे बाद जिस्सलै राज्यसभा दी बैठक दपैहरी 12 बजे फी लग्गी तां बरोधी धडें दे सदस्यें बिहार च मतदाता सूचिएं दी विशेष नजरसानी आहले मामले सनै होरनें बक्ख-बक्ख मामले गी लेइयै डंड रौली पानी शुरू करी दित्ती। हंगामा लगातार जारी रौहने करी सदन दी कार्यवाही गी दिन भरै लेई स्थगित करी दित्ता गेआ। राज्यसभा दे पीठासीन अधिकारी घनश्याम तिवारी होरें इस सरबंधै च आखेआ।

.....

दुई बक्खी लोकसभा च बी हंगामे आहले हालात बने दे रेह। पैहली बारी स्थगित होने दे बाद दपैहरी 2 बजे लोकसभा दी कार्यवाही फी शुरू होई तां बरोधी सदस्यें फी नारेबाजी शुरू करी दित्ती जेदे परैंत स्पीकर ओम बिरला होरें लोकसभा दी कार्यवाही गी दिन भरै लेई स्थगित करी दित्ता। स्पीकर ओम बिरला होरें इस सरबंधै च आखेआ।

.....

<><><><><><>

CM-Sabarmati Ashram

मुख्यमंत्री उमर अब्दुल्ला होरें अज्ज अहमदाबाद च ऐतिहासिक साबरमती आश्रम दा दौरा लाया ते महात्मा गांधी होरें गी नमन कीता। इस दौरे दरान मुख्यमंत्री होरें चरखा बी चलाया जेड़ा म्हेशां थमां गै महात्मा गांधी हुंदे कन्नै जुड़े दा इक सशक्त प्रतीक रेहा ऐ। आजादी दी लड़ाई च महात्मा गांधी होरें चरखे दा इस्तेमाल करदे होई गै लोकें गी सूती कपड़े लाने दा आह्वान कीता हा ते स्वदेशी अभियान गी रूप दित्ता। मुख्यमंत्री उमर अब्दुल्ला

होरें महात्मा गांधी होरें'गी चेत्ता करदे होई इक सोशल मीडिया पोस्ट च आखेआ जे अज्ज उनें उस चाल्ली चरखा चलाने दी कोष्ट कीती जिस चाल्ली महात्मा गांधी होरें कई दाहके पैहले चलाया हा।

<><><><><><>

Har Ghar Tiranga

मुख्व सचिव अटल डुल्लू होरें इस्सलै जारी आजादी का अमृत महोत्सव समारोहें दे इक हिस्से दे तौरा पर कल्लै थमां शुरू होआ'रदे राश्ट्रव्यापी “हर घर तिरंगा” अभियान 2025 दी तैयारियें दी समीक्षा करने लेई इक उच्च सतह दी बैठक दी अध्यक्षता कीती। मुख्व सचिव होरें इस मुहिम गी इक जन आंदोलन बनाने दी लोड पर जोर भरेआ ते मैहकमे गी आखेआ जे ओहू शैहरी ते ग्रामीण इलाकें थमां लोकें दी मती कोला मती शमूलियत गी यकीनी बनान। एहदे अलावा राश्ट्री एकता, गर्व ते देशभक्ति दी भावना गी होर मजबूत करने लेई स्कूली बच्चें, युवाएं ते हर तबके थमां लोकें गी शामिल करने दा आह्वान कीता। हर घर तिरंगा अभियान 15 अगस्त तोड़ी ते त्रै बक्ख-बक्ख चरणें च चलाया जाग।

<><><><><><>

Sampooornata-Abhiyan

पुंछ जिला प्रशासन नै नीति आयोग कन्नै रलियै अज्ज सम्पूर्णता अभियान सम्मान समारोहै दा आयोजन कीता तां जे बक्ख-बक्ख सरकारी योजनाएं तैहत हासल उपलब्धियें दा जश्र मनाया जाई सकै। मकामी कारीगरें गी सशक्त बनाने लेई तैयार कीते गेदे आकांक्षा हाट मंच दा बी इस मौके पर उद्घाटन कीता गेआ। जल शक्ति ते जनजातीय मामलें दे मंत्री जावेद राणा होर इस मौके पर मुख्व परौहने हे। अपने संबोधन च मंत्री होरें सम्पूर्णता अभियान गी सफलतापूर्वक लागू करने च जिला प्रशासन दे जत्तें दी सराहना कीती। एहदे अलावा उनें मनकोट बलॉक गी जम्मू-कश्मीर च पैहली थाहरा पर ते भारत च 9मीं थाहर दी रैंकिंग हासल करने लेई मुबारकबाद दित्ती। इस मौके पर बोलदे होई मंत्री जावेद राणा होरें आखेआ।

<><><><><><>

ते हुन बाकि दिएं खबरें कन्नै विजय बजाज।

Jammu-Tourism

धार्मिक सैलसफा गी बढावा देने दे मकसद कन्नै जम्मू सैलसफा मैहकमे नै रियासी, जम्मू, उधमपुर ते साम्बा जिले दी केई सारी नमी धार्मिक थाहरें गी सैलसफा सर्कट पर लेई आंदा ऐ। इस पूरे सर्कट च पेहले थमां मशहूर श्री माता वैश्वो देवी दे अलावा नो देवी मंदर, बाबा धनसर, शिवखोड़ी मंदर, गौरी कुंड, मान तलाई, सुद्धमहादेव, क्रिमची मंदर बगैरा गी शामिल कीता गेआ ऐ। एहदे अलावा सैलसफा मैहकमे नै सैलसफा गी बढावा देने लेई कई सारी सैलानी थाहरें गी बी सैलसफा आहले नक्शे पर लेई आंदा ऐ। एहदे च पंचैरी ते सनासर गी शामिल कीता गेआ ऐ। इत्थे लोक राती रेइए उत्थुआं दे छलैपे दा नन्द ठोआई सकदे ना। इस सर्कट च चिनाब रेल पुल, पत्नीटाँप, बाहू किला ते घराना वेटलैंड गी शामिल कीता गेआ ऐ।



Amarnath-Yatra

अमरनाथ जात्तरा आस्तै जम्मू थमां अज्ज बी कोई जत्था खाना नेई होआ। अमरनाथ जात्तरा कल बालटाल थमां परतियै शुरू कीती गेई। एह रस्ता खराब मोसम दी बजह कन्नै बंद कीता गेआ हा। तोआई पहलगाम आहले रस्ते थमां एह जात्तरा रख-रखाव आहले कम्मै दे चलदे अजें बी बंद ऐ। इस ब'रे अमरनाथ जात्तरा च 4 लक्ख थमां बद्द श्रद्धालुएं पवित्र गुफा च मत्था टेकी लैते दा ऐ। एह श्रद्धालु भारत दे बक्ख-बक्ख थाहरें थमां श्री अमरनाथ जी दी पावन जात्तरा आस्तै आए ना। 38 दिनें तगर चलने आहली एह पवित्र सलाना यात्रा 3 जुलाई गी शुरू होई ही ते एह यात्रा 9 अगस्त गी रक्खड पुन्नेआ आहले दिन सम्पन्न होई जाग।



Weather-Trends

जम्मू-कश्मीर च जारी बरसांती आहली रूतै दे मद्देनजर पैहली जून थमां 31 जुलाई तगर बरखा बरने सरबंधी आंकड़ें च कई सारे बदलाव दर्ज कीते गे। कश्मीर च जित्थे 22 फीसद बरखा घट्ट होई, उत्थे गै जम्मू खित्ते च

सामान्य थमां 8 अशारिया 7 फीसद मती बरखा होई। 4 थमां 6 अगस्त बश्कार किश थाहरें पर भारी बरखा दे असार दस्से गे न। आकाशवाणी दे जम्मू संवाददाता दी रिपोर्ट मूजब उधमपुर जिले च बड़ी भारी बरखें करी कई घरें गी नुकसान पुज्जा ऐ। डोडा ते किश्तवाड़ दे जिला प्रशासनें आसेआ भारी बरखा दे मद्देनजर स्कूली बच्चें ते अमले दी सुरक्षा गी ध्यानै च रखदे होई अज्ज सब्बै सरकारी ते निजी स्कूल बंद रक्खे गे।

<><><><><><>

Baglihar-Gates Open

रामबन जिले च होई दी भारी बरखा दे मद्देनजर बगलिहार डैम दे गेट खोली दित्ते गे न जेदे चलदे प्रशासन नै लोकें गी चनाब दरेया दे कंडे नेई जाने दी सलाह दित्ती ऐ। अडिशनल डिप्टी कमिशनर वरूणजीत सिंह चाढक होरें इस बारै जानकारी सांझी करदे होई दस्सेआ जे सब्भनें सरबंधत मैहकमें जि'या पुलस, एस.डी.आ.एफ, राजस्व ते ग्रामीण विकास मैहकमें दे अधिकारिएं गी निर्देश दित्ते गे न जे ओहू सांझे तौरा पर हालात दी निगरानी करन। मकामी लोकें जिंदे च माल बच्छें दे मालक, गड्डियां चलाने आहले ते होर दुए लोक शामिल न, गी सलाह दित्ती गेई ऐ जे ओहू दरेआ दे कंडे नेई जान। रामबन दे अडिशनल डिप्टी कमिशनर वरूणजीत सिंह चाढक होरें इस बारै होर जानकारी सांझी करदे होई आखेआ।

<><><><><><>

Haj Date Extended

हज 2026 आस्तै आवेदन करने दी खीरी तरीक बदाइऐ 7 अगस्त 2025 तगर करी दित्ती गेई ऐ। इच्छुक आवेदक हज कमेटी दी अधिकारिक वेबसाइट पर ऑनलाइन आवेदन करी सकदे न। लोक 'हज सुविधा ऐप' राएं बी आवेदन करी सकदे न। आवेदकें गी आखेआ गेआ ऐ जे ओहू सरबन्धी नीति ते दिशा-निर्देशें गी ध्यानै नै पढ़न ते अपनी दरखास्त जमा करोआन।

<><><><><><>

Padma-Awards

पद्म पुरस्कारें लेई नामांकन ते सफारशें दी खीरी तरीक 15 अगस्त तोहडी बधाई दिती गेई ऐ। पुरस्कारें लेई नामांकन छडे राश्ट्री पुरस्कार पोर्टल पर ऑनलाइन हासल कीते जाडन। बरे 2026 लेई पद्म पुरस्कारें दा ऐलान गणतंत्र दिवस, 2026 दे मौके उप्पर कीता जाहग। एकडे पुरस्कारें च - पद्म विभूषण, पद्म भूषण ते पद्म श्री पुरस्कार शामिल ना। एह पुरस्कार विशिष्ट कम्में गी मान्यता प्रदान करने लेई सभनें खेत्तरें ते विशें च विशिष्ट ते असाधारण उपलब्धियें सने सेवा लेई दित्ता जंदा ऐ।

<><><><><><>